

## 1 Tximòtxi-ò Paulo Juhuu Tyyriti Tximòtxi-ò

<sup>1</sup> Jiarÿ Paulo watxiwãhãre. Jesuisi Kristu deòdÿÿna watxiwãhãre. Deuxu iny tarasadumy riwateònyre, tule Jesuisi Kristu Inynyrÿ riwateònyre. Tii tahe inyararòsònareny rare.

<sup>2</sup> Katyyriti adee rewahinyreri Tximòtxi. Kai inatyhymy wariòre wesemy atximyhÿte ityhydÿÿdu mahãduy-ki. Tahe Deuxu-ribi Jesuisi Kristu-ribi luuna, ywina, ruxetòena, adee kanakemy watxireri.

<sup>3</sup> Jiarÿ Macedonia-ribi rareu, adee warybe rewahinyre kai Efesu hãwã-ki mabekemy. Kia adiwahinyde warybe tamy kia beòbykemy; kowa dori inyò Bede ywina tyyriti witxiramy ròerydÿÿnanyre riki. <sup>4</sup> Ihetxiu ijyymy heka rusake kiawesemy heka kai tamyreny marybekre. Talahi talabie òraruòraru-di he ròhòtinyòhyymyhÿkre. Kia aõna aõna tahe rybenatyhytyhyre. Kia aõna aõna iny lahi òraru rybena-di ixinohòtidÿÿõmy. Kia ityhydÿÿnadile kanakre.

<sup>5</sup> Kia wiluuna tahe inywolyrahakÿwo-ribi ròhònymyhÿre, iny raykylyrahakÿ wo-ribi, iny ityhydÿÿnatyhy-ribi. <sup>6</sup> Kia aõna aõna wihikÿ-ribi iny rexixãwididÿÿnyre. Tai tahe aõmybo rarybemyhÿre heka rieryòhyymyhÿre. Aõtyhymy aõkõ widee rarybemyhÿrenyre. <sup>7</sup> Bede ywina tyyriti erylidyÿdu wesekemy rexinohòtinymyhÿre, tahe rieryòhyymyhÿre aõmybo raremy. Aõmy rierynanymyhÿrenyre tahe timybo ihÿremy

rieryõlemyhÿrenyre. <sup>8</sup> Katahe inyboho rieryrenyre. Inyõ bedede ywina tyyriti òbitimy rityhynykeki, Bede ywina tyyriti heka awi rare. <sup>9</sup> Inywihikÿ-ò heka tiu bedede ywina tyyriti riwahinyõhyymyhyre. Inybina binaòle iwahidÿÿna rare, iny òrarudu-ò, iny ityhydÿÿdukõdu mahãdu-ò, iny aleerydu-ò, iny tadi tyby-wana rirubunymyhyre mahãdu-ò. <sup>10-11</sup> Kia iny-ò bedede ywina tyyriti rÿimyhÿre. Ibutumy bina bina widÿÿdu-ò. Bede ywina tyyriti rÿimyhÿre ka mahãdu-ò: inydÿÿwe mahãdu dee, taòtaòta witziramy òtadu mahãdu-ò, inywasidÿÿdu-ò, ruidu mahãdu-ò. Deuxu ijyy tÿmyra wihikÿ dee wiõkeki, tii aõna aõna riwinykeki, tamy. Deuxu bedede ywina tyyriti roimyhÿre. Deuxu bedeerydÿÿna òbiti aõkõreki, Deuxu wiwihikÿ loosònadewimy aõkõreki kia ersydyÿÿnadu jiarÿ rare.

<sup>12</sup> Jesuisi Kristu, iny wedu waruruixiòlòdÿÿdu rare. Jiarÿ tamy wawimy raremyhÿ. Tai tarybe-di wiòhedÿÿdumy riwatate. Kia-ò Jesuisi Kristu heka jiarÿ rewowydynyre. <sup>13</sup> Juhuu jiarÿ tuu rarybere. Ityhydÿÿdu mahãdu-ò wadeburemy rarewÿhÿ. Tule Jesuisi-ò wedeburemy rarewÿhÿ. Tahe wadee raruxetòenyrenyre. Tahe ibutumy kia reerykõlemy rewinyemy raremyhÿ, retyhynyõlemy rewinyemy raremyhÿki. <sup>14</sup> Inywedu sòwemy wadee raruxetòere. Tii riwasÿny ixiluuwehikÿkemy, rikityhynymyhyrenykemy. <sup>15</sup> Jesuisi Kristu kabede-ò dobehede òrarudu ritakemy. Ka rybe heka inatyhy rybe heka rare. Jiarÿ heka òrarudutyhy nihikÿ rare. <sup>16</sup> Iurenany tahe tii riwaruxetòenyre. Tiu heka waki rexiraõre.

Tii riwateòsinyre juhUU ityhydÿÿdu wesemy. Ityhydÿÿdu mahãduõ-ò itxerenamy, iwese tii mahãdu kidityhynykremy. Tai umy tuedekõdu mahãdu-ò ralòkemy. <sup>17</sup> Beàlamahãbenyke Deuxu-ò. Tii heka bededÿÿnana tuedeõdu hukÿ Iòlò rare. Tii lobixina aõkõ rare. Tii sohojile rare. Beàlamahãbenyke aõu aõu, wowydyna tamy biwahinyke. Kie.

<sup>18</sup> Ka inatyhymy rybemy adee ararybekre Tximòtxi –kai dori wariòre wesemy tate. Kia rybe heka ihetxinarybe wesele rare. Deuxu aratareu, kia biyrubunywihikÿke. Besuke arurutyhymy aõbo òbitimy ratximyhÿre wihikÿ-ò. <sup>19</sup> Aõhewe õhõtivydynawimy mabekre. Bityhynymy mabekre. Inyõ heka idi rõhõtinyrenyõra, tai reserenyra ityhydÿÿ-ribi. <sup>20</sup> Ijõ Imineu inire, Alexÿdre ijõre. Jiarÿ rewahinyre Satanasi-ò, Satanasi bedeburana tamyrenyriwahinykre. Tiiboho rybebinamy tii Deuxu-ò rarybeõtyhy.

## 2

<sup>1</sup> Delemy kamy ararybeke: Àlana sõwemy idi rawahinyke, ibutumy iny-ki bexitòtenykre. <sup>2</sup> Iòlò dee, ibutumy dinodu dee tule bexitòtenykre. Tamyreny biixitòedÿÿnanymy Deuxu-ò, tule Deuxumy beòbykemy, tai ibutumy iny iworana bedehesimy rÿikre. Deuxumy iny rõkõhõtinyrenykeny idi òbitimy tamy rokoirekemy. <sup>3</sup> Kia wese awire Deuxu dee. <sup>4</sup> Deuxudeewimy ibutumy iny ritakemy raerykemy tibo inatyhy raremy. <sup>5</sup> Deuxu sohojile rare iny-ki rybedu tule sohojile rare, Deuxu-ò iny mahãdu tii sohojile kia riwinyre. Tii hãbutyhyhykÿ rare. Tai tahe

tii tiò tiò rare, Deuxu, iny mahãdu-wana widee ributunykemy, Jesuisi Kristu wahe. <sup>6</sup> Jesuisi rexiwahinyre ibutumy iny òraruna òwydỹỹmy. Tii heka riòwynyrene sohojihyylemy. Kia heka tiiehyymy deòsidỹỹmy rarekemy. Tiu iny mahãdu rahenykemy Deuxu rexinohõtinyre. <sup>7</sup> Jiarỹ heka imynynamy riwamyre kia rybe-di arelyykremy. Tule jiarỹ rybe-di dohodỹỹdukremy riwamyre iny wixira bedeerydỹỹmy judeukõdu mahãdu wahe. Kia raerykemy tibo inatyhy raremy. Kia dori inatyhy rare.

<sup>8</sup> Ibutumy dohodỹỹna hetowo-ki ibutumy rexitòenyre rexityhynymy. Ujõmomomy rõhõtinyre aõkõ. <sup>9</sup> Hãwyy uritere ixidi nohõtityhyõmy ixiaõmydỹỹnadỹỹmy urile ywilemy ixidi rõhõtinykemy. Hãwyy ityhydỹỹdu ixiywidỹỹna tahe tyywihikỹ aõkõ, iradesihodỹỹtyhy aõkõ, deorutylududike aõkõ. <sup>10</sup> Urile tahe iyrubukemy Deuxu-di rõhõtinyke tamy aõwihikỹ riwinykre. <sup>11</sup> Hãwyy ityhydỹỹdu mahãdu ròeryrenykre yrubu-ki. <sup>12</sup> Jiarỹle heka hãwyy ariwahinyõtyhy hãbumy hỹỹnakemy, hãbu erydỹỹdukemy tule tuu areõnyke aõkõre, hãwyy heka urile iyrubumy rỹike. <sup>13</sup> Adaõ heka Deuxu juhule riwinyre idi Eva riwinyre. <sup>14</sup> Tule tahe Satanasi Eva juhuu riitxenanyre, Adaõ aõkõ tai raòrarunyrene. <sup>15</sup> Hãwyy uladu reakeule rexitake. Idi ròtyhydỹỹmy. Inyluumy idi rexityhynykreki.

### 3

<sup>1</sup> Kia rybe inatyhy rybe rare: –Inyõ dohodỹỹdu dinodumy rarekeki. Kia heka rexiburemyhỹre aõwihikỹmy ratximyhỹre. <sup>2</sup> Tahe rybe-di dohodỹỹ

aõmysỹdỹỹdumy ralòkeki, tii heka òbitimy rareke, tahãwyy sohojidile, rexityhynomy rarekemy, iny inatyhy, iny aòraru rarekemy, erynadỹỹdutyhymy rarekemy. <sup>3</sup> Tii heka iaxaxa luuõre aõbina luumy aõkõ rare tule iyrubure. Tahe tule iaõmy nohõtidu aõkõre. <sup>4</sup> Tii heka taijoimy reònymyhỹre, tariõre rierynanywihikỹmyhỹre ixirybe rityhynykemy. <sup>5</sup> Inyõ tahe taijoi reònyõkeki, Deuxu aõmydỹỹna-di òbitimy raaõmysỹdỹỹõtyhy. <sup>6</sup> Tii ityhydỹỹdu tỹmyra aõkõmy rarekemy. Raxiwedenomy rarekeki tahe urile Satanasi alòsena-txi tii reseke. <sup>7</sup> Ihãrele tahe ityhydỹỹdu mahãdu aõkõ rare ihỹre, awimy tuu rarybemyhỹre. Tuu heka raujõmorenyõtyhy tule tii Satanasi ireitidisi-txi reseõtyhy. <sup>8</sup> Tule dohodỹỹdu wiõhedỹỹdu mahãdu, kiawesele rarekemy. Tii tule òbitimy rarekemy irybe òkese òkese aõkõ, iaxaxaluu aõkõ rare, tule aõna aõna sõwemy nohõtidu aõkõ rare. <sup>9</sup> Iny inatyhydỹỹnareny òbitimy tuu rotohodỹỹnanymyhỹrenyke, tarayky òbiti-di. <sup>10</sup> Tule kia wesele raurihikre. Iribi òbitimy ròhònykeki, tai dohodỹỹdu wiõhedỹỹdu mahãdu-ò ralokre. <sup>11</sup> Ihãwyy tule òbitimy rarekre. Ujõmodumy aõkõ rarekre, iyrubukemy, urileta rexityhynomy rarekemy. <sup>12</sup> Tule dohodỹỹdu wiõhedỹỹdu mahãduõ ihãwyy sohojidilemy rarekre. Tariõre, taijoi-wana reònymyhỹkre. <sup>13</sup> Kia mahãduõ Deuxu aõmysỹdỹỹna òbitimy riwinymyhỹreki, inatyhymy tii iny rityhynykre. Tai Deuxu aõmydỹỹna tii riòbitinykre ibutumy inydee.

<sup>14-15</sup> Aroramy jiarỹ wylemy arakemy watzireri. Aõkõkeki urile warybe ritina adee rewahinyreri. Kia warybe-di bierynanybenyke aõhebo ityhy-

dỹ̃du mahãdu warybe-di rotỹ̃nykemy. Ityhy-dỹ̃du mahãdu Deuxu ijoiõ rare. Inatyhy rybe yrubudỹ̃du rare. <sup>16</sup> Iny tyhydỹ̃nareny awi tyhytyhy rare. Kia wese rare: –Jesuisi heka hãbu wese nade. Tii Deuxu Tyytyby-di òbitimy rityhynyreu, ỹjureny tuu robirenyre. Taaõmydỹ̃nanarenymy ibutu bede bedemy relyyreny. Sõwemy iny rityhynyreny. Roosere biu botorahakỹ̃-ò.

## 4

<sup>1</sup> Deuxu Tyytyby rarybera: –Ihewoladu bededỹ̃nana txuu hãbu tyytybybina rybe-ò roholakre. Tai iny tyhydỹ̃nanareny ririkre. <sup>2-3</sup> Tahe ruina rybe rityhynyre, hãbu aõmy nohõti erykõ rybe-ò. Kia heka hãbu raerynadỹ̃myhỹre uritere hãwymy heriõmykremy, ijõ rỹsỹna aõtxi irỹsỹõkremy. Kia rỹsỹna iny rirỹsỹke Deuxu riwahinyre. Juhuu àlana Deuxu-ò rawahikre. <sup>4</sup> Kia heka ibutumy Deuxu riwinyre awire. Aõ aõkõ heka awiõre. Deuxumy beõbyke, kia tahe ibutumy awike. <sup>5</sup> Ixitõedỹ̃na Deuxu rybe kia ibutumy awimy risỹnykre.

<sup>6</sup> Kai heka ityhydỹ̃du mahãdu bierynanykeki, kai heka Jesuisi Kristu aõmysỹdỹ̃du mahãduwihikỹ̃õ tate. Kia inytyhydỹ̃nareny erydumy mabekre. <sup>7</sup> Kai ihetxiu nohõtiwidỹ̃na ijyy bityhynyõtyhy. Marurunymy mabeke Deuxu aõmysỹdỹ̃nana-ò. <sup>8</sup> Aumyruru urihimyõmy idi mohõtinykre, atyytybywi-di tahe kia idi sõwemy mohõtinykre kai kabede-ki adeewikre tule tiu bede-ki awikre. <sup>9</sup> Kia rybe heka òbiti rare. Ibutumy iny rityhynyke. <sup>10</sup> Inyboho raaõmysỹdỹ̃nymyhỹre inatyhymy. Deuxu dori iny

rityhynyre. Tii ibutumy iny tarasadu ratximyhÿre, ityhydÿÿdule tarasadure. <sup>11</sup> Kia warybemy bierynanybenyke. <sup>12</sup> Iny aratyhynyõkeki kai matuari aõkõ tateki, tai ityhydÿÿdu wihikÿ mabekremy bexityhynyke. Tai tahe arybe-ò aratyhynykre aityhydÿÿna, aluuna, òbitina òraru-ki wahe. <sup>13</sup> Adehemynykre kotyre, Deuxu rybe-di mariakre dohodÿÿna heto-ki, idi belyykemy mabekemy tule bierynanykemy. <sup>14</sup> Uritere nohõti lusaõmy kai erydÿÿdu wihikÿ tatemyhÿ. Dohodÿÿna matuari mahãdu debòtidina-di arateònyrenyreu, wahisidÿÿna weseõ tetate rybe-di tÿnydÿÿna òraru-ki. <sup>15</sup> Kia aõmydÿÿnanamy mohõtinywityhymyhÿ. Ixidile bexiywinytyhymyhÿke bede erydÿÿnana-di tule bexiywinytyhymyhÿke. <sup>16</sup> Tai kai òraru-ribi bexitake tule aijohonana-di òraru-ribi bitakre.

## 5

<sup>1</sup> Matuari ityhydÿÿdu mahãdu-ò ywimy aõki tamy marybemyhÿke, bowese idi atximahãke Weryrybò mahãdu, aseriòre wesemy bitohodÿÿnyke. <sup>2</sup> Senadu mahãdu adi wesele bierynanykre. Ijadòma mahãdu aseriòre wesere ibutumy òbitilemy biywinykre. <sup>3</sup> Inatyhytyhy wytese mahãdu kai bityhynykre iòsÿnÿ biywinykre. <sup>4</sup> Iriòredikeki, iriòkòredikeki, juhuu iriòre bierynanyke imahãdule òbitimy biwiòhenanyke idi watxireri. Kia dori Deuxu dee awire. <sup>5</sup> Wytese mahãdu ixisohojilemy rasÿnymyhÿre iriòrekõkeki, Deuxu-ribi aõna aõna riraòmyhÿre. Deuxu dee sõwemy rexitònymyhÿkemy. <sup>6</sup> Kia tahe wyteseõ

òraruna luukeki kia tahe irulemy ratximyhÿre hãre rubu rare. <sup>7</sup> Tximòtxi, kia bede ywina tahe rewahinyreri urile wytese mahãdu òwe òweõmykremy bibedeerynanykre. <sup>8</sup> Inyõ juhUU tasÿreny dee idi aõna aõna taijoi dee kanawyõkeki, tii ityhydÿÿdukõdu mahãdu ratyre rabinare. Tii ityhydÿÿdu mahãdu wese aõkõ dotÿÿnymyhÿde. <sup>9</sup> Wytese tÿmyrani tyryiti-ki iritidyÿõmykre 60 ibeòraõkeki. Tule tii sohojihyyle roire hãbumy. <sup>10</sup> Tule tii aõna aõna wihikÿ riwinymyhÿre, tariòre ritybienyrene, taroraludu-ò awimy raremyhÿ, ityhydÿÿdu mahãduwa risuhòmÿ raremyhÿ, aõhõkÿtyhytyhymy rotÿÿnymy rare mahãdu riwiòhenanymy raremyhÿ. Aõu aõu heka iny witxira riwiòhenanymy raremyhÿ taworana bedehesi-di. <sup>11</sup> Wytese tÿmyrani heka tyryiti-ki iritidyÿõmykre. Hãbumy herimy rõhõtinyinmyhÿre wana, tai Kristu-ribi tõhõti rosamyhÿre. <sup>12</sup> Tarybe ywidÿÿna riywinyõlemyhÿre, tai iurenana tahe tuudÿÿdumy Deuxu-ò ratximyhÿre. <sup>13</sup> Hetomy rawerywerynymyhÿre kia urenana urile raujõmomyhÿre aõna aõnalemy. Aõ heka riwinyõlemyhÿre. Kia ratyre bina tahe tuu rybenanamy aõkõ rybebinamy rarybemyhÿre. <sup>14</sup> Kia heka wadee awire wytese tÿmyra hãbumy roikre, rariòrerenykemy, tule taheto riywinykemy. Kia wese iòludu inydeereny aõna aõnabinamy rarybeõhÿkÿkre. <sup>15</sup> Wyteseõ dori Satanasi hemy roire. <sup>16</sup> Wyteseõ ityhydÿÿdusÿ-ki rarekeki, tii heka riwiòhenadyÿ rÿikre. Kiawese dohodÿÿdu mahãdu nieru tamy ritakre. Kia nieru rayrubunykre. Tahe rawahikre ixisohojile



ratximyhÿre-ò.

<sup>17</sup> Matuari ityhydÿÿdu mahãdu iny rityhytyhynykre. Dohodÿÿna mahãdu aõmydÿÿnana òbitimy retehemy ratximyhÿkeki, ratyhytyhynykre. Inatyhytyhywityhymy kowa òbitimy relyymyhÿre tule rybe wihikÿ rierynanymahãre kia heka raòwywikre. <sup>18</sup> Tai tahe raritidÿÿmy roimyhÿre: –Broreni maixõmotyre iwysydÿÿmy rariamyhÿu, iry ratòbònyòtyhy ibyre lau. Tule ròritidÿÿmy roimyhÿre:

–Mobo raaõmysÿdÿÿmyhÿre, tii heka iny riòwynymyhÿre.

<sup>19</sup> Matuari mahãduõ iny tuu raujõmokeki, tuu arityhynyòtyhyke. Tuu lobixidu inatxi ada inataòkekile, aratyhydÿÿkre. <sup>20</sup> Tii inatyhymy òraruna-txi resereu, kai tamy marybeke iòrarumy ibutumy inyko-txi. Iurenana tahe ijõ iny ruberumy rÿimyhÿkremy. <sup>21</sup> Adee ararybekre. Deuxu, ÿjureny, Jesuisi Kristu-wana ibutumy warybe-ò roholareri. Kai warybe biywinykre. Myheka wiratyre widi rõhõtinyòtyhy. Tiiemy wiwese weselekemy rÿikemy. <sup>22</sup> Uritere rybe-di tÿnydÿÿdu tÿmyra juhu biurihike idi tahe debòtidina-di biteònyke rybe tÿnydÿÿmy. Kawese aòkõkeki heka hãbu òrarunamy tuudÿÿdukremy òsana mabekre. Aõmydÿÿnana tiiemy òbitimy biywinymyhÿ. <sup>23</sup> Bee sohojilemy aòkõ biõkre urihimyòmymy vÿimy biõkre. Kai dori awo ibinareriki tiiemy tuu abinareri. <sup>24</sup> Ijõ òraru aõwesele iny kanatÿnykre, bedeluura aõwesele kòdòhònykre. Ijõ òraru taheka idile kanatÿnykre. <sup>25</sup> Ruxetòenawihikÿ iwesele rare. Ele tii raeryòtyhy idi tahe iny

rierymyhÿre.

## 6

<sup>1</sup> Ibutumy wetxuõ tawedu rityhynykre. Tawedu rityhynyõkeki heka Deuxu nibinarybemy iny rarybekre. Tule ityhydÿÿdu eryna binamy rarybekre.

<sup>2</sup> Weduõ ityhydÿÿdukeki, kia heka ire ratyhydÿÿmyhÿke tule aõnityhymy tamy aõmysÿdÿÿkre. Tii dori ityhydÿÿdu seriõre wese rare. Kia dori taaõmysÿdÿÿnyteri ityhydÿÿdu widee. Kaiboho ixideerenyle wiluukemy. Kia tule bierydÿÿnykre.

<sup>3</sup> Inyõ erydÿÿna wixira ròerynanykeki kia òbitimy aõkõ Jesuisi Kristu Rybewihikÿ wese aõkõ ratxikeki, <sup>4</sup> kia hãbu ixiwede rare, aõ rieryõlere. Kia hãbu urile dÿÿraxidÿÿ luure. Kia dÿÿraxidÿÿ-ribi ibutumy rybe jei jei ròhònymyhÿre. Iribi tahe tule rexinaanymyhÿre, raujòmomyhÿre, rexiwodohonanymyhÿre.

<sup>5</sup> Raruimyhÿre. Kia ibutumy rotÿÿnyrerí, hãbu tõhõtina òweòwere. Inatyhyna-ribi kia hãbu tõhòti rosare. Ityhydÿÿdureki tii ròtakemy ixidi ratximyhÿre. Kiamy heka rõhòtinymyhÿre.

<sup>6</sup> Inatyhymy ibutumy heka tai iny aõtyhydÿÿdu-ki taaõ-di teysakreki. <sup>7</sup> Aõ kabede-ò iny ixihemy diwyõhydenyde inatyhymy heka rukururenykreu tule aõ ixihemy kabede-ribi rikiwyõtyhyrenykre.

<sup>8</sup> Iny tydirenykeki, iny rÿsÿnadirenykeki, urile reysarenykre. <sup>9</sup> Tahe inyõ ityhymy ixidikeki, tii òraruna-txi resekre. Kia heka iny rexiburemy, rexibinanymyhÿre, tule rexiraykyitxÿtenymyhÿre.

<sup>10</sup> Inyõ nieru luukeki, tii aõ òta òta òraruna-txi resekre. Kia-di heka iny sõwemy ityhydÿÿdu mahãdu-ribi ròhònyra aõhòkÿmy rotÿÿnyrenykre.

<sup>11</sup> Kai Deuxu ijoi tate. Ibutumy kia-ribi bexiemy mabekre. Uritere ityhymy ix-di nohōtiōmy tahe awimy mabekremy mohōtinykre. Deuxu wiwese, ityhydỹdutyhy wese, Deuxuluu wesemy. Tiiemy heka òbitimy atximahãke, ywimy ainytyhymy atximahãke. <sup>12</sup> Aõu aõu òbitimy atximyhỹkemy marurunyke, umy tuedekõnahakỹ bitakemy, kai tule inatyhy rybemy tarybete inysõweko-ò, Deuxu dori adee rarybere juhoo. <sup>13</sup> Inatyhymy adee ararybekre. Deuxu adee ijohonadu rare. Tule Jesuisi Kristu wadee ijohonadu rare. Tii inatyhy rybemy tarybete Ponsiu Pilatoko-txi. <sup>14</sup> Kaheka warybe rare: Kai heka bedede ywina bityhynyke aõ bedede ywina tyyriti òraru-ki aõhe botỹnyõtyhy. Biraòke Inyweddu Jesuisi Kristu dehemyynyna txuu. <sup>15</sup> Tiutxukremybo Deuxule kedexitỹnynykre, tii deysana wedu rare. Tii sohojile heka Iòlòmy rare. Ibutumy Iòlòweddu rare. Ibutu wedu wedumy rare. <sup>16</sup> Tii sohojile heka tiu ruruõhyy rarekre. Tii irehetyhymy loosònawo-ki rasỹnymyhỹre. Tiimyy heka inyõ tuu robiõtyhyre. Inyõ tiu iòhòmy tamy rehemynyõtyhy. Tamy rikiwodeysanyrenykre. Tiòhe aõu aõu taruru-di ratximyhỹ.

<sup>17</sup> Kai marybekre iaõdi mahãdu-ò uritere ta aõna aõna-di rexiwowydynyõtyhy, iaõna aõna dori rỹiõhyykre. Tahe Deuxule rityhynykre. Tii dori ibutumy aõna aõna wiwihikỹ inydeereny riwahinyre. <sup>18</sup> Tii aõna aõna wihikỹ inydeereny riwahinyemyhỹre. Iaõdi mahãdu uritere aõwihikỹ-di ijõ-ò rawiòhedỹnykre. Aõu aõu ròwirareamyhỹke iny-ò. <sup>19</sup> Kia wese tiiboho ributumyrenykre. Aõna aõna wihikỹ biu-ki awimy idi rarekre. Tule

umytuedekõnahakỹ tiiboho ritarenykre.

<sup>20</sup> Kai Tximòtxi, aõbo adee rawahidyỹre, kia biyrubunykre. Rybe òwe òwe-ribi irehemy mabekre. Aõbo heka raninireri bedeerydỹỹ kia heka inatyhy aõkõ rare. <sup>21</sup> Inyõ kia aõ erydumy ixi-di nohõti-ki, rexitara ityhydỹỹdu mahãdu-ribi. Deuxu deysanamy adee ratximyhỹkemy idi watzireri.

## **Deuxu Rybe Tyyriti New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 21 Feb 2024 from source files  
dated 29 Jan 2022

55ce0bcd-101e-52a3-984e-847027efe150